

(TRADUSAUN KOMUNIKADU KONJUNTU HUSI VERSAUN ORIJINÁL BA LIAN TETUN)

### **Komunikadu Konjuntu**

#### **Sorumutuk konsulta nian daruak entre funsionáriu nivel aas sira kona-ba segmentu sira ne'ebé la rezolve husi fronteira rai-maran entre Timor-Leste no Indonézia**

Dili, loron 8 fulan-abríl tinan 2017 - Repúblika Demokrátika Timor-Leste no Repúblika Indonézia nian hala'o ona sorumutuk konsulta nian daruak entre funsionáriu nivel aas sira kona-ba segmentu hirak ne'ebé la rezolve husi ketan-raik (fronteira terrestre) entre nasaun rua ne'e, maka hanesan segmentu Bijael Sunan/Oben no Noel Besi/Citrana. Sorumutuk konsulta nian dahuluk hala'o iha Bali, Indonézia, iha loron 10 no 11 fulan-marsu tinan 2017.

Iha sorumutuk iha fulan-abríl, delegasaun Timor-Leste nian prezide husi Roberto Sarmiento de Oliveira Soares, Vise-Ministru Negósius Estranjeirus no Kooperasaun Repúblika Demokrátika Timor-Leste nian no delegasaun Indonézia nian ne'ebé maka prezide husi Embaixador Desra Percaya, Diretór-Jerál ba Ázia-Pasífiku no África husi Ministériu Negósius Estranjeirus Repúblika Indonézia nian.

Durante diskusaun sira, delegasaun rua ne'e fahe hanoin ba malu katak, atu trasa segmentu (porsaun) sira ketan (fronteira) ne'ebé seidak trasa, husi parte rua ne'e hotu tenke haree ba lasu sosioekonómiku no moris-di'ak husi comunidade sira ne'ebé moris besik segmentu sira ne'e, ne'ebé sei sai alvu husi rejime espesial ida.

Iha sorumutuk ne'e nia rohan, Timor-Leste no Indonézia simu malu atu hala'o traballu kampu nian hodi estuda di'ak liu ba kestaun ne'e no buka solusaun sira ne'ebé bele hetan konsiderasaun polítika.

Durante sorumutuk ne'e, xefe delegasaun rua ne'e hatudu sira-nia fiar-metin kona-ba atu hakotu problema ne'e iha tempu badak. Xefe delegasaun rua ne'e hametin sira-nia kompromisu atu tau iha prátika orientasaun hirak ne'ebé na'i ulun sira nivel aas nian husi sira-nia nasaun fó ona.

Loron ida molok sorumutuk konsulta nian ne'e, hala'o ona diálogo reflesaun nian ida kona-ba tema ne'e "Promove pás no estabilidade iha rejiaun ne'e no iha li'ur, liuhusi fahe ita-nia esperiénsia únika rekonsiliaun no amizade nian", ho Mari Alkatiri, antigu Primeiru-Ministru Timor-Leste nian, no Hasan Wirajuda, antigu Ministru Negósius Estranjeirus Indonézia nian. Palestrante ilustre na'in rua ne'e fahe ho públiku ideia konkreta balu ne'ebé kona-ba oinsá atu rezolve segmentu sira fronteira nian, atu nune'e bele hametin liután relasaun entre país rua ne'e.

Alkatiri hateten ba rona-na'in sira katak "laiha problema entre ita-nia país rua ne'e, iha de'it maka kestaun balu ne'ebé seidak rezolve". Mensajen enkorajamentu nian ne'ebé hanesan hato'o tiha ona mós husi Hasan Wirajuda durante reflesaun ida hanesan ne'e, iha konsulta dahuluk nian, iha Bali, ne'ebé apela katak buat hotu tenke halo atu "rezolve agora, la bele husik hela hanesan liman-rohan ba jersaun sira tuirmai". Orador iha Bali, Xanana Gusmão insentiva membru sira husi delegasaun rua atu iha fiar-metin, hodi dehan katak "ita-bele no ita sei rezolve ita-nia diferensa sira".

###